

Ka hmathlir - Eiruk awm lo Mizoram

Submitted by :

*C. LALCHHANHIMA s/o C. HRANGTAWNA
BAWNGKAWN SOUTH, AIZAWL.*

EMAIL : chhantea77@gmail.com

Mobile no : 9862951635/9862361494

KA HMATHLIR : EIRUK AWM LO MIZORAM

State thenkhata BDO pakhat awp khawm tham lek mipui chanvo eihek sak a nih thu ram hmangaihtute'n an aupui changte hian 'eiruk' tih thumal hian an thusawiah hmun lailum a chang ziah thin!

Thingtlang lama miretheite dawmkanna tura duan policy hrang hrang a tam em em laiin an retheihna erawhin ziaawm lam a pan thei chuang lo. Mahni tih tur ti lo te vang emni an retheih? Eiruk nghawng that lohzia kan hriat avangin mitinin eiruk hi bo se kan duh a, kan ram hi eiruk awm lohna ram nise kan ti em em vek.

Sorkar inrelbawlnaah hian kan mawhphurhna leh theih chin a inan loh avangin thutlukna siam kawngah mipui tana tha ber tur ngai pawimawh ber ila. Chutiang sorkar chu mitin huapzo, hleihnei lo leh langtlang a nih dawn avangin, hmasawnnain a zui vat ang.

"Thatchhia an piangthar thei lo va, piangthar an thatchhe ngai lo," an tihna Kristian ramah hian eiruknain hmun a chang tur a ni lo va. Mizoram hian tih dan tha kan zawнна kawngah tih dan tha lo tam tak kan hmuchhuak a ni tiin, kan tih dik lohte kalsanin, a tihdamna gilead thinghnai chu kan thinlungah theuh a awm a ni tih Zoram mipuite hian hria ila, eirukna tel lo Zoram nuam kan siam thei ang.

Eiruk awm miah lohna rama kan ram siam thei tur erawh chuan mipuite hi kan inpeih hmasak a ngai a, eiruk hi kan hua a ni tih kan lantir hmasak a ngai.

"Kan duhthusam leh hmathlir - eiruk awm lo Mizoram," kan thlen tir theihna tura kan tih tur leh kan hriat ngai te sawiin : Eiruk awmzia, a nghawng theih te leh a inven dan kawngte i han sawi thla dawn teh ang.

Eng nge eiruk chu :

"Eiruk chu - hlepruk te, kut tling lova sum lakluh te, hlemhletna te, mahni hnaa rinawm lohna te, mi chan tur lak sak te, kohhran leh sorkar thil mahni hlawkna atana dik lo taka hman te leh sum hman

dan dik lova hmanral," te hi a ni. Thuneitute'n anmahni duhzawng leh hlawkna tura an thuneihna dik lo taka an hman hi eirukna a ni bawk.

Eirukna chungchang mi'n an sawi chuan, ngaihtuahna ah officer-ho leh politician-ho an lang nghal zat thin. A dinhmun zawnga ngaihtuah chuan officer ho hi Zoram mipuite zingah chuan dinhmun ngelnghet berte zing ami an ni. Chuti ni si, engvangin nge an eiruk tih zawhna a awm thei bawk. Chhanna tam tak awm thei zingah chuan 'duhamna' hi a chhan langsar ber pakhat a ni ngei ang. Hausak chakna te, mahni aia dinhmun tha zawkte awhna leh nuamsa taka khawsak der der chakna te hi eirukna thlentu lian tak an ni.

Chutiang khawpa thil sual ni si, Kristian ramah hian engtin nge a hluar em em theih? Ele, mi thil sual tih ngawih bopui leh ngaihnhathiam puitu nih chu mi tha nihna ah kan ngai a, midang thilsual tih sawi chhuaktu chu sualah kan ngai letling tlat a ni. Hei hi kan rama sual a punlunna leh a ngampatna chhan ber pakhat a ni.

Tin, eirukna ah hian a dinhmun sangte mai ni lo, a dinhmun hniam berte pawh hi kan fihlim chuang hauh lo. Sum hmuhna tur a nih phawt chuan dawt sawi kan hreh lo reng reng. Aizawl khawpuia cheng BPL member te inah hian han lenglut ula in hrethiam mai ang!

A nihna takah chuan, a huhovin eiruk kan hua a; mahse, eiru thei dinhmuna kan din erawh chuan kan sawi mam thei zel. Eiruk hi kan haw tak tak lo va, midang eiru hi kan thik mai niin ka hre thin.

Kan ram, Mizoram :

Kumpinu sorkarin Assam state chhunga kan ram a rin luh a, kum 1954 September ni 1-a district-a hlankai kan nih te, kum 1966 March ni 1-a Mizo National Famine Front (Mizo National Front tia a hming thlak tak) in India sorkar laka zalenna a puana kan ram chu rambuai a lo nih tak dan te, kum 1972 January ni 21-a Union Territory (UT)-a hlan kai kan nih te, kum 1986-a India sorkar leh MNF sorkar ten Remna Thuthlung (Mizoram Peace Accord) an siam te leh kum 1987 February ni 20-a Prime Minister Rajiv Gandhi-an India ram state 23-na ni tura State nihna chanvo min pek hun atang tea chhut phei chuan kan ram hi ala upa lo hle. Kum 20 tal tawp rambuai kan nih atang tea chhut phei chuan a sawi uarte sawi ang em em hian

kan ram hi ala chhe lo va, rih-artui-phur ang bek bekin hma lam panin a kal ve mek a, engtik ah emaw chuan ramtiam a la thleng ve ngei ang. 'Chak taka kal chuan tluk-palh a awm thei' tih thu hi kan ram roreltute hian an vawng tlat te pawh a lo ni reng thei e.

Tlan tur chuan kal thiam hmasak phawt a ngai a ni lovemni?!

Tin, kan ram hi sq. km 21,087 lek niin state zim te a ni a, mihring pawh 1,091,014 (census 2011) chauh chengin, sq. km khat chhunga mi 52 cheng ang zel kan ni. District 8 leh Block 23-ah inthen darhin, chawhruala district pakhata mihring 1,36,376 leh block pakhata mihring 47,435 chauh cheng ang kan ni. Kan state pui tam zawkte chhut chuan tlem tak kan ni, tlem tak! Tun hma pheii chuan rual u deuhthe'n, "Vai mitdel pawh kan zat lo ve, " an ti fiamthu thin.

Engtik lai atang khan nge eiruk hi kan ramah a lo hluar :

Karl Kraus-a chuan, "Nawhchizuar hian a chhia leh tha hriatna leh mimal nun a tichingpen a; chutih laiin, eiruk erawh hi chuan bang lovin ram pumpui a tichingpen a ni. Chuvangin, eiruk hi nawhchizawrh aiin a tha lo zawk," a lo ti a ni.

Tun hma kan pi leh pute hun lai kha chuan Mizote hi hnam rinawma chhal kan ni a, 'eiru' tih tawngkam pheii chu a rim a ra pawh an hre kher lo vang. Mahse, Sapho haw hnua India hnuaia kan luh hnu atang khan kan zonun zemawi chuan zawi zawiin min kiansan a, kan rilru puthmang pawh a lo danglam zel a; tun dinhmunah chuan, hnam naupangte nichungin eiruk hluarna state kan ni der tawh.

Corruption hi keimahnia ro kan inrel a, lal leh upate rorelna leh zawlbuk inthununna hmanga kan inawp lai khan a awm ve a nih pawhin a tlem hle ni tur a ni, British-in min awp lai pawh khan sawi tur a vang hle. British awpna hnuaia awm chungga India in thuneihna a ngah chhoh zel hnu khan sawi tur a tam tial tial a, India in min awp tak tak hnu hian a pung ta hluai niin a lang.

UT-a kan awm hnu atanga eiruk hi hluar ta hluai niin a hre zawkte chuan an sawi a. Chung hun laia kan dinhmun chu politician langsar tak Pu Lalsawia (Mizo District Council-a CEM hma ber leh MP lo ni tawh) chuan ti hian a ziak a, "UT-ah chuan budget kalpui dan enin eirukna hluar lo thei a ni lo, tangka lam thua buaina a awm

hleithei lo, kan bawrhsap hluite ho pawh nasa takin an buai a, an pawisa hmanna an han chhui ngial a, engmah hrema chu an nei thei ta lo, tangka maktaduai tel hial pawh engmah lo mai maia hman (central sorkarin) a phal avangin miin an zawngchhang a, tihsual a lo awm thei meuh lo a ni tih an hre ta. UT kan nih laia insak leh pawisa hmanna reng reng chu tun thleng hian a chhiat zia leh a tlaktlai lohzia chu kan hmu theuin ka ring," tiin.

UT kan nih atanga kum sawmna chiah, 1982 kha Mizoram Synod-in 'eiruk do kumah' a puang a, office minute nga-a tlai pawh 'time-corruption', 'office atanga paper leh eng ilo hawn pawh corruption a ni,' tia inzirtirin tang viau mah ila; a nuai bi tela eirukna chu a veng zo chuang lo ni awm a ni, tun hi kan thleng ta!

Zalen chanchinbu-ah Lalthlamuana Ralte chuan tihian a ziak bawk a. "Kawng hrang hranga hma kan sawn zel rual hian corruption kalphung pawh a inthlak ve zel a, eiru-te eiruk dan pawh a felfai tial tial (systematic) a. Sorkar hnathawk leh politician fing tak takte hian chhui chhuah hleih theih lohvin eiruk te an thiam ta khawp mai. Senior journalist pakhatin, '1980 chho atang khan sorkar hnathawkte hian systematic taka eiruk an ching chho tan a, tunah pheii chuan dan hmang pawha hrem theih loh turin an ziak bo thiam tawh,' a tih hi a dik hmel viau a ni. 'Corruption a hluar,' kan tih fo lai hian eirute hrem an ni ngai meuh lo thung. Chung awmzia chu eirute hian a ruk tak taka ei dan an thiam bakah sorkar inrelbawlna (governance) a that loh vang a ni ngei ang." Hei hi thil awm thei tak a ni.

Comptroller and Auditor General (CAG)-in a chui chiannaah, lottery buaipuitute'n Mizoram sorkar hnena an thehluh tur cheng vaibelchhe 11808.77 zet an thehlut kim lo nia tarlan a ni a, Mizoram sorkar lamin chhunglut turin an ti bawk hek lo niin CAG report chuan a sawi. Report chuan sorkarin lottery atanga sum a hmuh tur zat beisei atanga tuna a hmuh zat hi chu za zela 0.22% chauh a nih thu a tarlang a. Lottery enkawl kawngah hian danin inkaihhruaina a siam tam tak zawm a nih loh thu a sawi bawk a ni. Heng atangte pawh hian 'systematic' taka eirukna hi kalpui a nih theih dan chu a ngaih ruat theih mai awm e.

Eirukna in ram a nghawng theih dan :

Eng thilah pawh hian sum hman dik lohna leh eirukna a awm vek emaw tih hial tur khawpin eirukna hi kan ramah a hluar a. Henga inhnamhnawih te hian hremna an tawh ngai thin loh avangin eirukna hian kan ramah zung a kai nghet tawh hle. A tibo tur chuan thil tisualtute hi an phu tawka hremna kan pek a tul tawh takzet a ni.

Tun dinhmunah chuan, eirukna hi 'khualtha thlenin kan lo thleng' a ni ber hrih a. Khawtlangah nise, a eiru ngei nia kan rin te pawh dinhmun sang kan chantir zel a, endawng a hnekin kan intlawnsiak sup sup a, YMA/Kohhran thalai tana inhlawhna siamsak thei ngat phei chu kan chawimawi fo zawk a ni lo'mni? Kohhranah nise, puitling zirtirtu atanga pulpit tlang thlenga ding theiin kan lo siam a, sawma-pakhat pe tam thei leh thei lo inkar hlatzia chu mokawra-kuhva-eina-sen kai ang maiin kohhran mipuite mitah a langsar a ni. Hua a, a sawisel ngamtu nih erawh kohhran upate pawn an duh lo!

Ram changkang zawk politiciante thusawi kan in sawichhawn/tarlan (quote) siakna khawvelah hian kan ram politician te thusawi fing tak hriat tur a vang mai ni lovin, mipui tam zawkin fiamthu chanin kan chang tawh a ni ber a, an thusawi apiang hi rinhlelhna bengin kan ngaithla tawh emaw tih mai tur a ni. An hmingchhiatna thai bova insiamthat tum ahnekin, duhamna lamah khamkhawp an hmu thei reng reng lo va, Samsona'n Delili a ngaizawng ang mai khan, "Ka duh em a ni," an ti tluan zak mai a ni. An eiruk nasatzia chu an election affidavit atangin a lang reng a, an hmun lo ram neih thar leh an in leh lo din atang ringawt pawh hian a chiang reng a ni. Hetah tak hian mipuite'n kan duh lohna kan tih lan ve a ngai a ni.

- Ram hruaitute tlawn thiam contractor/supplier an nihlawh a. Ram hruaitu hlawk, sorkar official hlawk bawk; an hlawk tlang ngang aniang, mipuite chu riltamin kan rum vawng vawng mai a ni. Thil vanduaithlak tak chu - miretheite hian mihausa tlem tein kan chanvo min chhuhsak avanga lungawi lohna tih lan dan kan thiam tlat lo hi a ni.*
- Eiruk hluarna apiangah hmasawanna hnathawh a mumal ngai lo va, pawisa lengvelin suahsualna a hring chat bawk thin. Eiruk hian chhungkuaah nghawng tha lo deuh a nei a, fate'n an pate*

eiruk thu an hriat chinah chuan nu leh pa zah loh an ching a, chhungkaw inkaihhraina a lo buai ta thin. Thenkhat chu pawisa tam tak nei chungin an hlim chuang hauh lo a ni.

- *Eiruk hian nun ngheh lohna a thlen thei bawk. Miin hah taka, thlantui far chung a hna a thawh chuan pawisa hlutna a hria a, ren takin a hmang thin. Chutiang ni lo va, eiruk-sum ringtute chuan sum hlutna an hre lo va, nun nghet an nei thei lo va, nun awmzia an man pha lo. An rilru pawh sual lakah a khauh thei lo reng a ni.*
- *Politics khelhnaa eiruk hian mipui leh ram tana sorkar ruahmanna lian tak tak a tihlawhchham thin a, sumdawannaah rinawm lohna hring chhuakin, inbumna ramah a ram chu a chantir thuai thin.*
- *Kohhran mi tha tak tak te pawh politics-a an luh chuan an Kristianna a lang lo thuai thin. Sumin a tibuai nge, awhna sualah an tlu ve! A hotu lu ber atanga harhna an chan loh chuan, MLA satliah ringawt tan 'danglamna' lian tham thlen a har thin.*
- *Mipui vantlang nun a nghawng hi rapthlak berin, mipuiin ram hruaitu leh sorkar an ring ngam lo mai ni lovin, mi zawng zawng inrinhlehtawna a thlen thin a, chu chuan hnam inlungualna a tichhiain, intih tel telna a hring a, a tawpah phei chuan thisen hial a luantir fo.*
- *Project lian pui pui ruahman leh thawk ve uk a, tihlawhtling leh tak tak si lovin awmze nei lovin kan chenna leilung leh thing leh mau nasa takin kan tichereu a, kan environment-in nasa takin a chhiat phah thin.*

Eirukna do kawnga thawhhlawk tak Prism-in Mizorama eiruk nasat chhan bulpui pathum nia an hmuh te chu : -

(i) Mi corrupt-ten dan hremna an tawh thin loh vang,

(ii) Kan politics khelh dan that tawh loh vang,

(iii) Kohhran leh NGO tam zawkin eirukna kan pawm vang te a ni, an ti.

- *Prism rising day vawi 10-na ni 1/8/2016 a Prism Secretary report atanga kan hmuh danin : CBI, ACB leh Police hnenah FIR*

67 thehlut tawhin, Supremre Court-ah PIL 2 leh High Court-ah PIL 12 thehluh a ni tawh a, sorkar thuneitu hrang hrang hnenah siamthat rawtna 55 leh an tih dik loh an siamthat theih nana an thil tih dan sawiselna 47 an thehlut tawh.

- Prism hmalakna avang hian eiru chhuichhuah mi 300; chanhai eiruk sak pek let 107; sorkar hnathawk tura dik lo taka lak ban leh 57; dik lova compensation hmuh tum hmu thei lo 293; dik lova sum kal ral tur humhim cheng vaibelchhe 1800 vel a awm tawh thu an sawi a, eiruk hmangte pirchhuak thin mahse, sorkar thuneitu lamin chhan an tum zel nia a lan thu an sawi bawk. Kum 2017 February thlaa Special Court (Prevention of Corruption Act)-a prosecution witness an nih anga inlan tura tih, an inlan tak loh chungchangah pawh, "An pawl hmalakna hrang hrang avanga eiru chhuichhuah tawh mi 300 zinga mi 1 chiah lungin-a khung ala ni a, sorkarin an thlavang a hauh thin zawka an ngaih thu sawiin, hriatthiam harsa an tih thu an sawi bawk."

Hetianga sorkarin ram hmasawinna hna thawh tumna tak tak a nei lo tih an hmuh tak sup sup-ah leh eirute hrem an nih tak tak ngai bawk si loh avangin mahni tanghma hai theihna hmuna awm apiangin an eiru ta sup sup a, thil tha tihin nghawng tha reng a neih tak loh avangin eiruk tumna nei ngai lo te pawhin eiruk an ching ta a ni.

Kan state-ah sum dehchhuah zung zungna tur hmanrua (resource) kan neih that loh avang leh a hman ral lama kan chak bawk si avangin kan ram sum dinhmun a tha lo hle a, 'a sen a kaw'k' ti hialin political party pakhat president chuan a sawi a ni.

Kan ram kalphunga dik lo tak chu sorkar sum mahni ta anga kan hmang thin lo hi a ni. Mizoram sorkar leibat hi kumtinin a pung chho zel a, sorkar laipui pawhin kan leiba ngah lutuk hi a ngaimawh tawh hle. Tun dinhmunah chuan, kan ram sorkar hian kan leiba neihte hi a theih ang ang sukiang hmasa se la, tul lova sorkar sum hmanralna lakah inveng hrih bawk se. Kan sum dinhmun, tuna 'a sen kaw'k' hi 'a hringa' a tlakthlak hun nghak phawt sela a tha ang.

Engtin nge eiruk kan do theih ang :

Ramin hma a sawn dawn chuan ruahmanna tha a awm hmasak phawt a ngai a. Chutiang hmahlir leh ruahmanna te chu a taka chan tir tur chuan thuneihna chelh mektute'n tih hlawhtlin an duh takzet bakah, sorkar hnathawk te, kohhran leh pawl hrang hrang te, khawtlang roreltu te leh mitinin hma kan lak a ngai a ni.

- Eiruk tihbo nana kawng hmasa ber chu langtlang sorkar siam a ni : Sorkar tha ah chuan langtlang kalphung hi neih makmawh a ni. Sorkar dik lohna hailan te, mipuiin an chanvo an hriat nante, sorkar leh mipui inkar dawhzawm a nih nante langtlang sorkar hi neih a ngai a ni. RTI Act 2005, Section 4-in a phut angin department zawng zawng Action plan/Work schedule te hi a duh apiang hmuh theih tura department website-a tarchhuah vekte hi a tul hle. Tunah hi chuan department website tam zawk hi chu kan rula raw neih mai mai a ni. Tin, sorkar tha leh inrelbawlina felfai nei tur chuan 'audit' hnathawh tih chak a tul. Accountant General Office hian Mizoram sorkar hnuaia office hrang hrangte a endik (audit) thin a; amaherawhchu, an indaih bik loh avangin duhthusamin office/department te an vil hneh tawk lo niin a lang. Audit hna dik leh chak taka kalpui a nih theih hunah chuan office tinte an fimkhur anga, tul lova sum khawhralna lak ata kan inveng thei dawn a ni.*
- Dan rorelna (Rule of law) tihchak : Eirute chhui leh hrem hi thil tul tawpkhawk a ni. A chhuitu agency leh judicial system tha neihna ramah eiruk a tlem bik tih Tranparency International chuan a sawi. Politics-a thiltithe deuhle leh an sangawizawnpuite'n dan an pawisak theihna tura kan dan neihsa kan tihchak a, dan anga dik taka rorel kan tum tur a ni. Court rorelna (Judiciary) te pawh hi kum 2008-a tihhran chu a ni tawh ngei mai; amaherawhchu, mipui rilru ah erawh dan roreltu (Judicial personnel)-te thununtu awm tlata hriatna te hi a bo chuang lo. Sorkarin Vigilance Commission dinin Anti-Corruption Bureau hi thuam tha in, judicial system hi tiphuisui tha se la; a hnathawk te enkawl leh hmalak kawng tinrengah dan angin kal se la, a ruka hnathawkte thunun thei miah lova kalpui nirawh se. Tin, corruption chungchanga mipuite'n complain an thehluh theihna tur buatsaih se la, uluk taka enkawl nibawk rawh se.*

- *Mawhpurhna sem zai : Thuneihna hmun khata tham khawm vek hi inrelbawldan dik a ni lo va, chanvo leh mawhpurhna semzai hian midangte tan phurna a thlen mai bakah hna a ti awlsam a ni. Mipui sorkar (Democracy)-in a tum ber chu sorkarnaa mipuite teltir a ni. Mi pakhat rorelna te, mi pakhat lal hrawtna te hian mipuite thinlungah neitu nihna a awm tir thei lo va; miin neitu anga a inngaih loh chuan sorkar tha a chhuak thei ngai lo. Tun dinhmunah chuan mipuite'n vote kan thlak hi sorkara kan telna pakhat chu a ni mai a; mahse, hemi bak hi chu sorkar inkhaidiat danah hian mipuite'n telna tak tak kan nei tawh lo.*
- *India danpui siamthat vawi 74-na in a phut ve avangin, kan state sorkar pawhin khawpui inawpna, "The Mizoram Municipalities Act, 2007," a lo pawm hi hmasawna lian tak a ni. Aizawl khawpui bik enkawl tura Aizawl Municipal Corporation (AMC) siam a ni hi a lawmawm a; chutihrualin, kum 2009-a a dintirh atangin India danpui 12th schedule-a subject awm 18-te, a tahtawla an kuta state sorkar-in a hlan turte hi hlanfel a, hnathawk tak tak tura siam hi a hun ta hle. AMC ruhrela pawimawh tak Ward committee te pawh hi mumalin an la kal lo va, thuneihna an chantur chin peka thawk ngei tura tihnun thar a tul hle.*
- *Right to Information Act (RTI) hmang tangkai tura mipuite zirtir : Sorkar hnathawh leh a kalphung hi sorkar-neitu mipuite'n an hriat hi India danpuiin tha a ti hle a, chumi behchhan chuan Right to Information Act 2005 pawh siam a ni. Kan hriat duh ang ang chu RTI hmanga hailan zel tur a ni. Sorkar hmalakna hriat zel hi mipui dikna chanvo a ni.*
- *Zirna sikula eiruk that lohzia inzirtir : Eirukna in ram hmasawna a tihmuan dan te, mihring inrintawna a tihchhiat dan te, chungkaw tam tak a tihbuai a, hremhmuna mi a hnuhlul tam tawhzia te, rethei leh hausa inkar tizautu a nihzia te leh khawvel chawk buaitu a nihzia te hi zirlaite hnenah uluk taka zirtir ni se la, an thanlen hun pawha an theihngilh lohna turin an thinlungah kan tuh tlat tur a ni.*
- *Sorkar policy lo neih tawh thinte thlirin, a bultan (implementation) lamah hi chuan kan titha viau thin a; mahse, a vil leh endik (monitoring) lamah tan kan lak nasat a ngai. Tin, hnathawk thate lawmman pek hian mi a tiphur thei a, dik tak*

leh rinawm taka thawk te chu midangte entawn atan i fakmawi thin ang u.

- Chanchinbu mite'n investigative journalism uar se : Eiruk do kawngah media mite hi an tangkai em em a, an kawng sah kuak azarah police department te pawhin thil tam tak an chhui chhuak a ni. OECD Anti-Bribery Convention kum 1999-a din a nih atanga 1st June 2017 thleng khan - foreign bribery case 2% lai chu media-report atanga hriatchhuah a ni. **(OECD 2017, The detection of foreign bribery)** Chanchinbu leh mi thahnemngai te'n eirukna chungchang an ziah te hian sawimam dan zawng lovin a mawhphurtu zawng chhuakin, a tul anga hremna lekkawh turin sorkar hi han huaisen deuh se la, eiruk chingte'n an tinawn fo ngam lovang.
- Corruption dona kawnga inhmang te venhimna pek : USA chuan Whistleblowers Reinforcement Act 1998 a nei a, Australia chuan Australia Whistleblower Protection Act 1994 a nei tawh bawk. Eirute chhui hi thil hlauhawm tak a ni a, nun chan tate pawh an awm a ni. Khawvel pum huapa mi liante'n chhiah awlruck tuma Panama law firm pakhat 'Mossack Fonseca' an belh thu khawvel pum huapa kum 2016-a rawn tlangthang ta - 'Panama Papers' tia hriatlar te pawh kha mi pakhat hming hriat lohvin document tam tham tak German newspaper 'Suddeutsche Zeitung' hnena a pek atanga bul rawn intan a ni a, a sahimna atan a inthup tlat a ngai a ni. Hetiang mi huaisen leh dikna hailan duh mi tlemte te avang hian dikna hian lalna a chang leh hlauh thin.
- Red-tapism dan nana E-office din : Mizoram sorkar hnuaia UD & PA chu e-office a hlan tawh a ni. Amaherawhchu, mumal taka kalpui chhunzawm niin a lang lo. Department dangte pawh e-office-a hlan kai zel ni se la, a nih dan tur dik taka kalpui a nih chuan eiruk do kawnga tangkai tur tak a ni. E-file kan hman chuan file chhah pui pui chawi kual a ngaih tawh dawn loh avangin hna a rangin, a chhui zui pawh a awlsam dawn a, eirukna a-zung-chawpa-phoro kawngah a tangkai hle dawn a ni. Tin, 'paperless office' a nih tawh dawn avangin, Delhi emaw USA emaw atang pawhin, tablet hmangin minister-incharge in file a lo approved hmak hmak thei dawn a, hei hian sum leh pai, tha leh zung tam tak a hum dawn a ni. Arunachal Pradesh CM Pema Khandu-a hi e-file hmang tangkai em em nia sawi a ni.

- *Online bill payment : Information Technology department te kan nei tawh a, office tin deuh thaw ah internet connection kan thlun rup tawh laia online-a bill pek theihna kan la nei mang lo hi mipui harsatna thlentu leh eiruk theihna kawng hawngtu a ni.*
- *Sorkar hnathawk transfer : Hunbi neia sorkar hnathawkte sawn kual hi eiruk veng theitu a ni. Hmun khata mi a awm reng chuan a hnuaia thawkte nen inlaichinna tha lo a siam thei a, hmun kilkhawr deuhah phei chuan eirukna hun remchang insiam a theih awm e. Sorkar hnathawkte chu sorkar chhawr an nih angin, anmahni ruaitu-in insawn tura a hrilhna hmunah chuan an kal mai tur a ni.*
- *Mizoram hian 'Sixth Schedule'-a inziak angin tualchhung rorelna (village coucil) kan nei a; mahse, an thuneihna leh an dinhmun chhutin thuneihna semzaina (political decentralisation) tak tak a tling pha lo. India danpui siamthat wawi 73-na (73rd amendment) angin thingtlang leh tualchhung rorelna 'Panchayati Raj' ruahhman ve ni se; Mizote hian hmasawanna thar kan neih ngei a rinawm. Tin, hei hian mipuite tun aia thuk lehzuala sorkar rorelnaa inrawlh theihna min siamsak anga, sorkar thuneitute'n mipui min ngaihpawimawh tawk lohna awm thei lakah min veng thei ang. Hei hian, eirukna do thlengin min pui thei dawn a ni.*
- *MLA-LAD leh MP-LAD fund hman tangkai : MLA Local Area Development Fund atan hian kum tinin tunah hian Mizoram MLA (Member of Legislative Assembly) 40 rual te hian nuai 100 theuh an bial chhung tihhmasawanna turin an hmang thei a. Tin, MP (Member of Parliament) pahnih Mizoramin kan neih te pawhin MP-LAD scheme hnuaiah hmasawanna hna thawh theihna turin kum khatah cheng vaibelchhe 5 ve ve an nei bawk. Mipuite'n hetiang zat sum hi kan roreltute kutah a awm a ni tih kan hriat a tul a, an hmanna te pawh kan hriatpui ve thlap thlap tur a ni. Hei hian eiruk a veng ang a, hmasawanna ruhrel tha leh tlo dinna kawngah mipuite'n sorkar kan pui tihna a lo ni reng mai dawn a ni.*

Mizoram Kohhran, NGO leh Community ten sorkar an tihchak theih dan :

- Kohhran leh khawtlang hmalaknain vantlang nun siamthatna leh mipui a tha zawnga inzirtirna neih thin a ni a. Heng: faina, hriselna, ruihhlo dona, politics thianghlim inzirtirna kawngah te hian hma nasa takin an la a ni. Inthlanna felfai leh muanawm kan neih theihna tura Mizoram People's Forum (MPF) hmalakna te hi thil tha tak a ni.
- Mipui rorelna (Democracy)-ah chuan kan NGO hrang hrang te hi sorkar leh mipui inkar lei dawhzawmtu pawimawh tak an ni a, mipui rilru sukthlek chu heng pawl hrang hrang hmangte hian a lo lang thin a ni. Hei hi sorkar tha chuan a enliam tur a ni lo va, mipui mar dehna pawimawh tak a ni tih hriain, umzui chin a hre tur a ni. Ram leh hnam humhalh kawngah te, Mizona chawivul kawngah te, kan khawtlang nun tha chhawmnun kawngah te hian NGO te kuta inngah dan tawk thiam se la; sorkar scheme thenkhatah te hian heng: YMA, MUP, MHIP etc te ang hi a thlithlaitu leh dawng theitu tur thlangtu ah te hmang ngam ila, party induhsakna uchuak awm thei lakah kan inveng thei dawn a ni. Heng atana kan hmang hreh deuh a nih pawhin, tualchhunga hmasawna hnathawh endiktu ah hmang ila, sum senso leh hnathawh dinhmun (quality) inmil lo lutuk turte a veng thei ang a. Mipui tana him lo khawpa hnathawh chhia ang hi a bo thei ang.
- Kohhran hi pawn lam atanga sorkar khalh ngiltu tur a ni : Zofate inpumkhatna atana hmanraw tha ber chu kohhran a ni. Mizote sakhaw zawm ber chu Kristian a ni a; chuvangin, Mizo khawtlang leh mimal nun khalh kaltu ber chu kan Kristianna a ni. Mi tam takin, sorkar rorelnaa kohhran inrawlh an sawisel nasa viau a, sorkar leh kohhran a hranga kaltir chu mi tam tak ngaihdan niin a lang. Amaherawhchu, kohhran emaw sorkar emaw hi a hrangin an kal ngawt thei lo. Inhal lova an tih tur leh mawhphurhna chin an hriatchian a, thurawn inpe tawna an thawhdun thiam chuan ram tan a hlawkthlak khawp ang.
- Khawtlang sualna ven kawnga hmalakna hmasa ber tur chu chhungkuaah a ni. Mitinin mahni fate theuh kan enkawl that chuan sualna hi a kiang duak thei ang. Chu chuan, ram

venghimtu te tan pawh hahdamna a thlen dawn a ni. Chhungkua hi kawng engkima zirlai kan zir tanna a ni si a.

- Kohhran leh khawtlang kaltlanga ngaihsan tur dik leh entawn tur tha inkawhhmuh hi thil pawimawh tak a ni. Tin, nundan tha (moral and ethics) lam pawh inzirtir kan uar a ngai. Naupang mai ni lo, puitling te pawh hi mihring hlutna zirtir a, eirukna haw tura zirtir tauh tauh kan ngai a ni.

Mizoram Kohhran, NGO leh Community ten sorkar an tihthuanawp theih dan :

- Mizoram-a Non-Governmental Organization (NGO) te hian sorkar kalphungah nghawng lian tak an neih theih avangin sorkar kalh zawng leh sorkar hnathawh hunbi tisukuk thei zawnga programme huaihawt fo loh ching se a tha in a rinawm. Sorkar office hnathawh hunchhung kan zahthiam hian sorkar kan tanpui a ni.
- Sorkar inrelbawlina leh policy duan kawngah te hian sorkar hian kohhran leh khawtlang te hi vengthawng lutuk suh se. India ram hi sakhaw zalenna ram a nih angin kohhran venthawn lutuk hi state dang ngaihah a mawi lovin, a dik lo palh thei a ni.
- Sorkar policy-te hi mithiam bik ten ngun taka an zirchian hnua bawhzui tura chhawpchuah an ni deuh tlangpui a. Entirnan : Zu khapna dan hlih chungchang te. Khang thilah te pawh, kohhrante'n sorkar hmalakna tithuanawp zawnga a pawng a puia kan do nghal bur ringawt te khan nasa takin ram rorelna a ti buai thei tih kan hriat a tha hle.
- Kohhran/NGO hrang hrangte'n inkhawmpui kan neih nikhuaa senso leh tul dangtea sorkar kan ban buai thin hi bansan a hun tawh hle. Heng atana sum hman tur hi sorkar-in a hranpaa budget-a a dah loh avangin, budget dang atanga pawhpen a ngai ta thin a, hei hian hmasawna hnathawh thenkhat a tikhaihlak thei a ni. Tin, pawl thenkhat huaihawta, sorkar kar nana kawng zawh leh total bandh kan huaihawt fo mai te hian sorkar rorelna a tibuai nasa hle a ni tih hriat a pawimawh.
- Dan bawhchhiate, dan kengkawhtute hnena pe mai lova mob-rule hmanga lo chinfel ve ngawt kan tum thin hi khawtlang mipuite kan insiamthat ngaihna lai a ni. Hei hian dan kenkawnna (law-enforcement) ah harsatna tam tak a thlen thin.

Mipuite hian dan chungchang inzirtirna (legal-awareness) kan mamawhin, dan kan hriat loh avanga kan tihsual a tam hle a ni.

- Sorkar officer leh MLA/Minister te'n hna an thawk tha lo kan ti emaw, an eiru niin kan hria emaw, an tawngkam emaw vanga lungawi lohna kan neihin, danin thiam loh a chantir hma hauhva an hnathawk tur lo dan emaw rokhawlhna dang emaw lo siamsak thin hi intihhmuh atana tha lo tak a ni. Mipuite hian dan kan zah a, thuneitute chet hun nghah kan zir a ngai.
- Mizote hi khawtlang tihdan phung (societal norms) nei teuh kan ni a, thenkhat hi chu kan than ti thu tu a ni chawk. A tha zawk tih hrereng chungka kan kal dan pangngaia khawtlang kalpui tlat duhtu kan tam em avang hian, a hmasawn lo zawnga sorkar hmalakna daltu kan ni palh thei e.
- Mizoram hi Kristian ram a nih rualin, kohhran hi kan lo Pathian reng thei a ni. Kan home minister hlui chuan kohhrana nihna pawimawh chelhte chu sawnkual an har thu a sawi. Mahni hna rinawm taka thawh hi Pathian duhdan a nih a rinawm a; hetiang, kohhrana an nihna chelh avanga an mahni ruaitu sorkarin harsatna a tawh hian ngaihtuahna a kal thui tir khawp mai. Saptawnga, "Work is worship," an lo tih angin, kohhran kan ngaih pawimawh tluk zeta kan hna kan ngaih pawimawh thar a ngai a ni.

Eiruk awm lo Mizoram :

"Sum tam tak aiin hmingthat hi thlan zawk tur a ni," tih Bible-in a lo sawi a. Hei pui, Hindu pachalin a lo man fuh tlat mai. Tripura Chief Minister a nih lai pawha 'India ram CM zinga rethei ber' an lo tih thin, kumin an ram assembly inthlanna atana a affidavit thehluh atanga a lan dan chuan, a kuta pawisa fai a kawl zat chu Rs 1,520 a ni a, a bank account-a pawisa a neih zat chu Rs 2,140 chauh a ni. Hetiang zat chauh pawisa nei hian eiruk a huatna chu tawngka mai ni lo, nunphungin a lantir mek a ni. Kum 20 a CM hnu pawha mahni puala in nei lo khawpa nun hniam hian India ram pumpui chu politics khelh dan thar a kawhbmuh tlat mai. Mizo pa lar Pu Vanneihluanga sawi atanga ka hriat danin, Zampui tlangdunga Mizo pa pakhat phei chuan, "Manik Sarkar-a nun tlawm tak hian Krista hmel min hmuhtir a ni," a ti tawl mai, a ni awm e.

Kan ram pawh kan harhchhuak dawn. Thangthar fel tak tak te'n politics hi an pute ho hunlai anga 'eizawna hmun' a nih lohzia an hre dawn a, mipuite aiawha chhiahhlawh kawr ha tura thlanchhuah an nihna chu an theihngilh dawn reng reng lo. Chung hunah chuan nang leh keia tu leh fate hian leiah pialral an chen dawn!

Sorkar hna lakna ah Mizoram Public Service Commission (MPSC) ten a tling chiah an lak dawn avangin an lakah mipuite'n rinna an nghat tlat dawn a, an lak ang ang chu sawiselbo-ah ngaiin, a 'fair-lo' tia au au tur an awm tawh dawn lo.

Thingtlangin hma a sawn chuan khel lovin khawpuiin hma a sawn dawn tih ram roreltute'n an hriatchian em avangin thingtlang lam hmasawna kal natpui a ni ang. Lo neitute lahin a hunah tak zel thlai chi leh hamthatna te an dawng thlap thlap ang a, anmahni enkawltu sorkar mithiamte pawhin kan ram tana an tihtheih tawk tia an inngaih dawn avangin an vil reng dawn a, lo neitute harsatna tawh thin hrang hrang - rannungin an thlai a eichhiat te, natna hrang hrangin thlai a tlakbuak te leh a venhimna lam te tunlai science thiamna sang ber ber hmanga chinfel a ni ang. Chu mai bakah, thlai chi tha zawk leh thang duang leh hrisel zawk 'hybrid seed' kan lalut ang a, tunhma zawng aiin kan tharchhuah pawh a tam dawn a ni. Tin, a hralhna tur 'bazar rate' hresa thlapin an ching ang a, buh leh balah kan intodelh tawh ang.

Lo neih thingtlang mite kuta kan dah tawp leh ei ve tawk tawk tura kan ngaih thinna chu thlak danglam a ni dawn. Dik taka sorkarin a kalpui chuan a lo hlawk si zia te kan hre thar anga; taksa tan a lo hrisel kher bawk nen, khawpui mite hlei hlei hian an la uar ve dawn. Chutih hunah chuan, hnathawh tur hre lo an tlem em em ang. Tin, tui hnianghnar taka hman tur a awm theih nan ruahtui khawl lamah tan kan la nasa lehzual ang a, tui intur thianghlim khawtinah sem a ni bawk ang. Hei hian tui thianghlim lo in avanga natna hrang hrang awm thei lakah a khaw mipuite a veng ang a, ram pumin hriselna kawngah hma kan sawn thei ang.

Tourism lamah kan Northeast pui - Sikkim leh Meghalaya kan umpa thuai dawn bawk. Kan khualthate tlawh tur hmun mawi leh bengvarthlak hrang hrangte chu ramdangmi te hriat phakin kan chawilar ang. An zan riahna tur lah, mikhual kan ngah tawh dawn avangin kan 'thlen in' te pawh anmahni an inenkawl zo tawh ang a, a

thawktute lahin ram tan rawng an bawl a ni, tih an inhriat tawh dawn avangin, tawng leh nunchang mawite inzir tharin, kan mikhualte tihlawm tumin an theihtawp an chhuah tawh ang.

Hmasawn tur chuan power supply a mumal a ngaih avangin, heti lamah intodelh thuai kan tum bawk ang. Kan thenawm state Tripura-in a khamkhawp mai ni lo, hralhchhuah tham power a siamchhuah theih chuan kan thei ve em em ang. Tin, khawvel ram changkang zawkte pawhin an intihhmuh mek solar energy hman tangkai kan tum ang a, kan leilung hausakna humhalh pah kan tum ang. Tun central sorkar kallaia scheme pawimawh deuh mai chu Jawaharlal Nehru National Solar Mission (JNNSM) a ni a, he programme hian 100 GW (GigaWatt) solar power kum 2022 ral hmaa siam chhuah tumin, khawvel ramte zinga solar energy lama hmahruaitu nih a tum a ni. He hmachhawp ropui tak hi phase thum (3): phase I (2010-13), phase II (2013-15), phase III (2017-22) ah te then niin, tunah hian hna a kal mek a ni.

Chu mai ala ni lo, sum leh pai zawng zan khat thilthua ral mai thei a nihzia Zoram mipuite'n kan hriat tawh dawn avangin tuman eiruk buai an tum tawh dawn lo va, sorkar sum chu a hmanna tur chat chat-ah hman a nih vek dawn avangin kan ram chu 'Switzerland' ai pawha chenna nuamah kan siam thei dawn a ni. Public Work Department (PWD) lam pawhin, thingtlang kawng zawng zawng chu mam tha takin kan sum neih ang angin an siam ang a, thingtlang kawng ber a that tawh chuan a pan zung zung a awlsam ang a, hmasawna a rualkhai sawt dawn a ni. Khawpui chhung mai ni lo thingtlang kawnga a mam tha lo deuh hlek a awm pawhin an ngaithei tawh dawn der lo! A rang a rangin 'rulngan pa ang zara' dakin an siam tha nghal zel ang. Ruah sur apianga kawng diak leh kawi ang kha chu 'kan pianthar hma thil a ni' tiin thawnthu hlui-ah an chantir dawn.

MLA te vahvelna tur car manto uchuak lei lovin, mipui hriselna leh damlo te enkawlina tur damdawiin changtlung tak din a ni ang a, Doctor fel tak takin an vil reng ang. Hei hian rikrum thila khawpui pan chuk chuk ngai tur tam tak a veng ang a, nunna tam tak chhan a ni ang. Tin, 'disease surveillance system' tih changtlun a ni ang a, hri leng tur lo hriat zung zunga, a invendan lo ngaihtuah lawk vat zel a ni ang. Damdawiin a thlen phak lohna hmunah Primary Health Centre leh sub-centre uluk taka thuam that a ni bawk ang.

e-Healthcare kalpui tum a ni ang a, rikrum thila hmun kilkhawra awmin harsatna a tawh pawhin, an awmhmun atangin doctorte an rawn nghal zel thei ang. Hemi thlentir thei tur hian, thingtlang hmun kilkhawr berah pawh network/tele-communication leh internet speed chak tha pangngai tak man tlawm zawkin siam a ni ang. Ni 11 October 2018 chhuak The Hindu newspaper pheh hmasa berah chuan, "A whatsapp network helps protect hearts," tih thupui hmangin, kum 2016-a cardiologists doctor pathumin bul an lo tan - Jammu and Kashmir hmun kilkhawra chengte tana whatsapp group kaltlanga rawn theiha an awm avangin, ni 288 kalta chhung khan mi 7029 lai lung lam that lohna lakah an chhanchhuak a ni. Jammu and Kashmir hi a vawh em avangin heart-related-problem a tam em em a ni. Tunah hian whatsapp group pathum siamin, senior physician leh cardiologist 256 laiin group hi an vil tawh a ni."

Education department lam nise, zirtirtu aikal lak chingte pawh an pianthar tel dawn avangin an hnathawhna hmun lam panin an kal duak ang a, mithiam tak tak vek an nih hlawm avangin, tuman Aizawl-a nei lo chung chung a sikul kal hram an tum tawh lo vang a, mahni khuaah theuh zirna tha (quality education) kan dawng ang. Chu chuan Aizawl khawpui tawt lutuk pawh a chhawk zangkhai nghal ang a, chawhma vela traffic jam luih luih thin pawhin ziaawm lam a pan nghal ang. Tin, private school fee to uchuak te vengin, sorkar ruahmanna hnuaiah zirtirna tha leh mantlawm zawk kan nei bawk ang. Kan sawi ta sa sa, Finance department lam lah, Zoram mipuite sum khawihtu an nihna anga an pawimawh zia hriain, file thangrei lutuk te a awm tawh lo vang a, a hranpaa zu nawr buai ngai lovin a neitu mipuite mamawh hun huna lakchhuah theihin an file te pawh an lo khawihsak zel dawn a ni.

Kan sawi bak department dangte pawh an harh thar vek dawn avangin, a hmingtha lo bik nih hlauvin an phe vat vat dawn a, tuman eiruk tih vel an sawi an sawi tawh dawn lo. Rinawmna chu an nunah a bet tlat tawh ang a, sorkar file vawi khat pawh la bihchhin lo Sairang-a fu tui zuar te, Lengpui daia anhnah zuar te pawhin sorkar lehkhaw vawngtute chu rinhleleh buai an tum dawn lo. Kan ram hi democracy ram (mipui rorelna) a nih ang ngeiin mipuite'n ro an rel tawh ang a, sorkar leh mipui inkar pawh a inhlath tawh ngai lovang.

Kan hmaa state lian leh changtlung zawkte umphak tumin mahni hna theuh thahnemngai takin kan thawk ang a, thiante kep ngai nih chu mualphona tawp a ni tawh ang.

A tlangkawmna :

Confucius-a chuan, "Sorkar rorelna tha hnuaiah chuan retheih hi a zahthlak a, sorkar rorelna tawp hnuaiah erawh chuan hausak hi a zahthlak ve thung a ni," a ti.

Hmasawmna atana sum ruahmanin a thlenna tur a thlen phawt chuan mirethei an tlem sawt ang a, chu chuan mi rethei leh hausa inkar zau lutuk a siamtha nghal ang. A dinhmun a hniam em avanga 'ka ram' ti ngam ngai lo khan, a dinhmun chawikana a awm hnu chuan a ram humhalh nan 'thi leh thau pawlh' mai ni lo; lu chhum ban chhum huamin 'tawlh loh puan' sin a inhuam ngei ang.

"Sem sem dam dam, ei bil thi thi," tia zonun zemawi kan pipute'n an lo lantir thin kha kan chhawm nung ang a, he chhinlung chhuak Zofate pialral Zoramah hian, "Dam leh tlang khatah, thih leh ruam khatah," tiin Zohnahthlak zawng zawngte insuihkhawmin kan leng za ang a, 'pialral kan tawng kan vangkhuaa'n' tiin tumah inhau buai leh rilru na kan awm tawh lovang.

Submitted by :

C. LALCHHANHIMA s/o C. HRANGTAWNA

BAWNGKAWN SOUTH, AIZAWL.

EMAIL : chhantea77@gmail.com

Mobile no : 9862951635/9862361494